

- A** Aure audietis, & non intelligetis : & cernentes aspicietis, & non uidebitis : & cætera quæ ipsius prophetiæ sermo contextit. Audiui ego in hoc loco non paruam Hebræi mei disputationem ; cuius pauca ponam , ut sensum hominis aduertas . Aiebat , de Moyse , & Esaia , quis melius fecerit , requiramus : utrumne Moyse , qui cum a Deo mitteretur ad populum , ait : Precor Domine , non sum dignus : & rursum , prouide alium , quem mittas : An Esaia , qui cum non fuisset electus , ultro se obtulit , dicens : Ecce ego , mitte me : Nec ignoro , dicebat , periculosum esse de sanctorum meritis disputare , & aliquid uel minus uel plus disserere uelle de eo , quem Dominus coronauit : sed quia ipse dixit : Quærite , & inuenietis : pulsate , & aperietur uobis : etiam nos , non ut de aliquo detrahamus , sed ut , scripturæ sensum scientes , ad eius nos dirigamus exempla , debemus inquirere quod potest facere quæstionem .
- Qui Moysi , inquit , assertor est , humilitatem eius prædicat , ac mansuetudinem ; quod se indignum iudicans ministerio Dei , maior effectus sit . Esaia uero , quia ultro se obtulit , incipiens prophetare , a maledictis cœpit : Aure audietis , & non intelligetis &c. Ob quod inde multa mala perpeffus , & ab omni populo pro insano habitus , cum iterum ei uox diuina dixisset , Clama ; sciens quid superiori facilitate se ipsum offerens pertulisset , non ait : Ecce ego , mitte me : sed interrogauit quid illud esset , quod clamare deberet , & dixit : Quid clamabo ? Cui simile est illud in Hieremia : * Accipe calicem uini meri huius de manu mea : & potionabis omnes gentes , ad quas ego te mittam : & bibent , & uoment , & insanient , & cadenta facie gladij , quem mittam in medio eorum . Quod cum audisset propheta , non renuit , non secundum exemplum Moysi dixit : Precor Domine , non sum dignus , prouide alium quem mittas : sed amator populi sui , & putans quia ex potu calicis inimicæ gentes interficerentur , & ruerent , calicem meri libenter accepit ; non intelligens , in omnibus gentibus etiam Hierusalem comprehendi . Denique inter ceteras nationes , Et accepi , ait , calicem de manu Domini , & potionauit omnes gentes , ad quas misit me Dominus , & Hierusalem , & ciuitates Iuda , & reges eius , & principes eius , ad ponendas eas in desolationem ,
- B** & in inuium , & sibilationem . * Pro qua prophetia licet in plerisque codicibus ordo sit peruersus , quid in alio loco dicat , ausculta . Seduxisti me Domine , & seductus sum : * tenuisti me , & potuisti : factus sum in derisum tota die , exiui in subsannationem . Et e contrario qui assertor est Esaia , (dicebat) illa proferet : prophetam , non tam sui merito , quam misericordiam Dei confisum , postquam a Seraphim audierat , ecce tetigit hoc labia tua , & auferet iniquitates tuas , & peccata tua purgabit , otio noluisse torpere , sed ultro in ministerium Dei , quasi a peccatis liberum , zelo se obtulisse fidei : Moysen uero , quia sæcularibus eruditus fuerat disciplinis , & , interfecto Aegypto , conscientia eius aliqua ex parte sorduerat ; unde & uox ad eum de rubo facta sit , dicens : Ne accesseris huc : & solue calciamenta de pedibus tuis : locus enim , in quo stas , terra sancta est : & scierat sibi aduersus magos , & aduersus Pharaonem , pessimum regem , futurum esse certamen : se excusasse dicentem : Precor Domine , non sum dignus : pro quo in Hebræo legitur , non habeo labia circumcisa , * Septuaginta interpretibus sensum potius , quam uerbum de uerbo exprimentibus . Ex quo manifeste possit intelligi , Esaia recte , post circumcisa labia , in Dei se obtulisse ministerium , & Moysen , adhuc incircumcisus labijs , tam grande ministerium recusasse . Aure audietis , & non intelligetis : & cernentes aspicietis , & non uidebitis . Totus hic locus , sicut Saluator dicit in euangelio , ad id pertinet tempus , quo ipse est dignatus descendere ad terras , & signa Iudæis non intelligentibus perpetravit . Et quoniam usque ad finem capituli explanatio multiplex sequitur ; & excipientis iam explicuimus ceras : hucusque distasse sufficiat : quia & oratio , quæ non propriæ manus stylo expolitur , cum per se inculta est , tum multo molestior fit , si tædium sui prolixitate congeminet : * ut oculorum dolore cruciati , auribus tantum studeamus , & lingua .